

# PREDIKATLAR HISOBI AKSIOMALARI.

## Predikatar mantiqi formulasining normal shakli.

**1- ta'rif.** Agar predikatar mantiqi formulasi ifodasida faqat inkor, kon'yunksiya, diz'yunksiya ( $\neg, \wedge, \vee$ ) amallari va kvantorli amallar ( $\forall, \exists$ ) qatnashib, inkor amali elementar formulalarga (predmet o'zgaruvchilar va o'zgaruvchi predikatlarga) tegishli bo'lsa, bunday formula **deyarli normal shaklda** deyiladi.

Ravshanki, predikatar mantiqi va mulohazalar algebrasidagi asosiy teng kuchliliklardan foydalanib, predikatar mantiqining har bir formulasini **deyarli normal shaklga** keltirish mumkin.

**1- misol.**  $(\exists xP(x) \rightarrow \forall yQ(y)) \rightarrow R(z)$  formulani deyarli normal shaklga keltiramiz.

$$\begin{aligned}(\exists xP(x) \rightarrow \forall yQ(y)) \rightarrow R(z) &\equiv (\overline{\exists xP(x)} \vee \forall yQ(y)) \rightarrow R(z) \equiv \\ &\equiv \overline{\overline{\exists xP(x)} \vee \forall yQ(y)} \vee R(z) \equiv \overline{\exists xP(x)} \vee \overline{\forall yQ(y)} \vee R(z) \equiv \\ &\equiv \exists xP(x) \wedge \exists y\overline{Q(y)} \vee R(z).\end{aligned}$$

Predikatlar mantiqining deyarli normal shakldagi formulalari orasida **normal shakldagi formulalar** muhim rol o'ynaydi. Bu formulalarda kvantorli amallar yo butunlay qatnashmaydi, yoki ular mulohazalar algebrasining hamma amallaridan keyin bajariladi, ya'ni normal shakldagi formula quyidagi ko'rinishda bo'ladi:

$$(\sigma x_1)(\sigma x_2) \dots (\sigma x_n) A(x_1, x_2, \dots, x_m), \quad n \leq m,$$

bunda  $(\sigma x_i)$  simvoli o'rnida  $\forall x_i$  yoki  $\exists x_i$  kvantorlardan biri yoziladi deb tushuniladi va  $A$  formula ifodasida kvantorlar bo'lmaydi.

**1- teorema.** *Predikatlar mantiqining har qanday formulasini normal shaklga keltirish mumkin.*

**Isboti.** Formula deyarli normal shaklga keltirilgan deb hisoblaymiz va uni normal shaklga keltirish mumkinligini ko'rsatamiz.

Agar bu formula elementar formula bo'lsa, u holda uning ifodasida kvantorlar bo'lmaydi va, demak, u normal shakl ko'rinishida bo'ladi.

## **Bajariluvchi va umumqiymatli formulalar.**

**2- ta'rif.** Agar  $A$  formula ifodasiga kiruvchi va  $M$  sohaga oid o'zgaruvchilarning shunday qiymatlari mavjud bo'lib, bu qiymatlarda  $A$  formula chin qiymat qabul qilsa, u holda predikatlar mantiqining  $A$  formulasi  $M$  sohada **bajariluvchi formula** deb ataladi.

**3- ta'rif.** Agar shunday soha mavjud bo'lib, unda  $A$  formula bajariladigan bo'lsa, u holda  $A$  **bajariluvchi formula** deb ataladi.

Demak, agar biror formula bajariluvchi bo'lsa, bu hali uning istalgan sohada bajariluvchanligini bildirmaydi.

**4- ta'rif.** Agar  $A$  ning ifodasiga kiruvchi va  $M$  sohaga oid hamma o'zgaruvchilarning qiymatlarida  $A$  formula chin qiymat qabul qilsa, u holda  $A$  formula  $M$  sohada **aynan chin formula** deb ataladi.

**5- ta'rif.** Agar  $A$  formula har qanday sohada aynan chin bo'lsa, u holda  $A$  **umumqiymatli formula** deb ataladi.

**6- ta'rif.** Agar  $A$  formula ifodasiga kiruvchi va  $M$  sohaga oid hamma o'zgaruvchilarning qiymatlarida  $A$  formula yolg'on qiymat qabul qilsa, u holda  $A$  formula  $M$  sohada **aynan yolg'on formula** deb ataladi.

Keltirilgan ta'riflardan ushbu tasdiqlar kelib chiqadi.

1. Agar  $A$  umumqiyimatli formula bo'lsa, u holda u har qanday sohada ham bajariluvchi formula bo'ladi.

2. Agar  $A$  formula  $M$  sohada aynan chin formula bo'lsa, u holda u shu sohada bajariluvchi formula bo'ladi.

3. Agar  $M$  sohada  $A$  aynan yolg'on formula bo'lsa, u holda u bu sohada bajarilmaydigan formula bo'ladi.

4. Agar  $A$  bajarilmaydigan formula bo'lsa, u holda u har qanday sohada ham aynan yolg'on formula bo'ladi.

Demak, predikatlar mantiqi formulalarini ikki sinfga ajratish mumkin: bajariluvchi sinflar va bajarilmas (bajarilmaydigan) sinflar formulalari.

**7-ta'rif.** *Umumqiyimatli formula mantiq qonuni deb ataladi.*



Endi predikatlar mantiqidagi formulalarning umumqiymatliligi va bajariluvchanligi orasidagi munosabatni ko'rib o'taylik.

**2- teorema.**  *$A$  umumqiymatli formula bo'lishi uchun uning inkori  $\bar{A}$  bajariluvchi formula bo'lmasligi zarur va yetarlidir.*

**Isboti.** Zarurligi.  $A$  umumqiymatli formula bo'lsin. U holda, ravshanki,  $\bar{A}$  istalgan sohada aynan yolg'on formula bo'ladi va shuning uchun ham u bajarilmas formuladir.

Yetarliligi.  $\bar{A}$  istalgan sohada bajariluvchi formula bo'lmasin. U holda bajarilmas formulaning ta'rifiga asosan  $\bar{A}$  istalgan sohada aynan yolg'on formuladir. Demak,  $A$  istalgan sohada aynan chin formula bo'ladi va u umumqiymatlidir. ■

**3- teorema.**  *$A$  bajariluvchi formula bo'lishi uchun  $\bar{A}$  ning umumqiymatli formula bo'lmasligi zarur va yetarlidir.*

**Tarkibida bir turdagi kvantor amali qatnashuvchi normal shakldagi formulalar uchun yechilish muammosi.**

**1- ta'rif.** Agar predikatlar mantiqi formulasi tarkibida erkin predmet o'zgaruvchilar bo'lmasa, u holda bunday formula **yopiq formula** deb ataladi.

**2- ta'rif.** Agar predikatlar mantiqi formulasi  $c$  tarkibida  $x_1, x_2, \dots, x_n$  erkin o'zgaruvchilar mavjud bo'lsa, u holda  $A \equiv \forall x_1 \forall x_2 \dots \forall x_n C(x_1, x_2, \dots, x_n)$  formula  $c$  formulaning **umumiy yopilishi** va  $B = \exists x_1 \exists x_2 \dots \exists x_n C(x_1, x_2, \dots, x_n)$  formula  $c$  formulaning **mavjudligini yopish** deb ataladi.

**1- teorema.** Agar predikatlar mantiqining normal shakldagi yopiq formulasi, tarkibida (ifodasida) faqat  $n$ ta mavjudlik kvantori qatnashgan hamda bir elementli istalgan sohada aynan chin bo'lsa, u holda u umumqiyimatli formuladir.